

四庫全書

史部

欽定四庫全書

史部

會稽志卷十

詳校官監察御史臣沈孫璉

檢討臣德生覆勘

總校官知縣臣楊懋珩

校對官中書臣李棻

謄錄監生臣馬紹基

欽定四庫全書

會稽志卷十

宋 施宿等 撰

水

府城

府河在城南二里屬會稽縣河東南流經府市北出定清門入運河又西北流由蕭山達于浙江

單鰲河在府西二百步一名殺鰲河舊經云越王勾踐

投鰲之所或又名勞

去聲

師潭水經越王栖會稽有酒

投江民飲其流戰氣百倍所投醪卽浙江也華安仁
考古云句踐謀霸拊存國人與共甘苦師行之日有
獻壺漿跪受之覆流水上士卒承流而飲之人百其
勇一戰而有吳國也唐太和六年觀察使陸亘重浚
華安仁云府東大河也然俗以府學前西河為是或
又有新河匯水為之舊經云投醪卽浙江蓋自府河
東西諸流皆
達于浙江也

運河在府西一里屬山陰縣自會稽東流縣界五十餘
里入蕭山縣舊經云晉司徒賀循臨郡鑿此以溉田

新河在府城西北二里唐元和十年觀察使孟簡所浚

會稽縣

海在縣北二十里海水北流入嘉興府海鹽縣史記秦始皇上會稽望于南海二世並海南至會稽西漢地理志南江從會稽吳縣南入海中江從丹陽蕪湖縣西東至會稽陽羨東入海北江從會稽毗陵縣北東入海蓋漢會稽地廣綿亘數千里凡三江皆繇此以達于海也水經云江水奇分謂之三江口又東會稽

東入于海又云浙江水出三天子都北過餘杭東入于海三記之說不同至江流入于海則古今論者不

能易也

釋名云海者晦也主引穢濁其水黑而晦博物志云天地四方皆海水相通地在其中蓋

無幾四海之內闕復有海也初學記云凡四海通謂之裨海其外復有大瀛海環之曰百谷王一日朝夕池一日天池一云大壑海神曰海若海中山曰崑海中洲曰嶼水經餘姚故城背巨海王粲海賦云翼驚風而長驅集會稽而一覲隋書志開皇十四年詔東海于會稽縣界並海立祠取側近巫一人主洒掃

曹娥江在縣東南七十里源出上虞縣經縣界四十里

北入海會稽典錄云曹娥上虞人父盱漢安二年迎

伍君神沂濤而上為水所溺娥年十四自投江而死
江因娥得名也世說晉陽秋曹娥父盱溺不得尸娥
投衣於江祝曰父在此衣當沉旬有七日衣偶沉娥
遂投江而死縣長度尚悲憐其義為之葬且命邯鄲
子禮作碑蔡邕聞之來觀夜闇以手模其文而讀之
題云黃絹幼婦外孫壺白二百年後碑當墮當墮不
墮逢王巨魏武過曹娥碑下讀碑陰八字謂楊脩曰
解否荅曰解魏武曰卿未可言待我思之行三十里

魏武乃曰吾已得之令脩別記所知脩曰黃絹色絲也幼婦少女也外孫女子也瑩白受辛所謂絕妙好辭魏武亦記之與脩同乃嘆曰我才不及卿乃較三十里異苑云蔡邕過吳讀曹娥碑旁作八字魏武見而不能解有婦人浣於汾渚曰第四車乃解既而悟曰禰正平也衡即以離合義解之此婦人即娥靈也二說不同世說亦兩存之廟碑晉夏侯統曰曹娥父子喪尸後乃俱出國人哀其孝義為歌河女之章潘道

遙題詩云曹娥廟前秋草平曹娥廟裏秋月明扁舟
一夜烟無寐近聽潮聲似哭聲

若邪溪在縣南二十五里溪北流與鏡湖合越絕云若
邪之溪洄而出銅吳越春秋云赤堇之山已合無雲
若邪之溪深而莫測戰國策云洄若邪而取銅破堇
山而取錫溪旁即赤堇山也後漢劉寵為會稽太守
去郡若邪父老人齎百錢相送為受一大錢十道志
云後人因此名劉寵溪唐徐季海嘗遊溪因歎曰曾

子不居勝母之間吾豈遊若邪之溪遂改為五雲溪
李白詩云若邪溪邊採蓮女笑隔荷花共人語李公
垂詩云傾國佳人妖艷遠鑿山良冶鑄爐深自注云
若邪溪乃西子採蓮歐冶鑄劍之所

樵風涇在縣東南二十五里舊經云漢鄭弘少時採薪
得一遺箭頃之有人覓箭問弘何所欲弘識其神人
也荅曰常患若邪溪載薪為難願朝南風暮北風後
果然世號樵風水經云鄭弘少以清節自居恒躬采

伐用貿糧膳每出入溪津常感神風送之憑舟自運
無仗楫之勞村人貪藉風勢常依隨往還有淹留者
徒輩相謂曰汝不欲及鄭風耶其感致如此宋之問
詩云歸舟何慮遠日莫使樵風劉長卿詩云仙客常
因一箭贈樵風長到五雲間

涇去聲齊祖之鑄浦涇
詩云掃拂涇蓬出涇來

自注越人謂
水道為涇

鑄浦在縣東南三十里與若邪溪接一名錫浦浦上有
橫梁人家聚落歐冶祠齊祖之家山記事云昔歐冶

子鑄神劍之所今為里俗所祠

沉釀埭在縣南二十五里若邪溪東十道志云鄭弘舉

送赴洛親友餞於此以錢投水依價量水飲之各醉

而去一名沉釀川

寰宇記云太尉泉一名沉釀埭按太尉泉即鄭公泉弘自飲此水愈

疾以埭為泉非也蘇鶚演義云鄭弘官京洛未至宿一埭名沉釀弘投錢水中勸酬飲盡多酣暢皆得大

醉更名為沉釀泉與十道志所載不同

浪港在縣東南二十里樵風涇之北天無風亦常有浪

港北循山逕一巨石頃歲里人因開逕得石鑪鐵鈴

恐為仙人鍊丹之所

炭浦在縣東六十里舊經云句踐運炭於此越絕云句踐稱炭聚載從炭瀆出至鍊塘冬因事而名之吳越春秋云吳封地百里於越東至炭瀆

纂風浦在縣東六十五里

石瀆在縣東四十八里

小舜江在縣東南九十里源出浦陽江東北流至錫浦
以至于江

清苦溪在縣東三十五里一名橫山源出台州寧海北
流入縣界溉田三百餘頃

了溪在縣東北一十五里源出了山合縣南溪流以入

于剡溪舊經云禹疏了溪人方宅土

華安仁作趙仲淵傳云安道采

真於了水安道戴逵也
以了水通剡故云

平水在縣東二十五里鏡湖所受三十六源水平水其

一也唐元微之撰長慶集序云嘗出遊平水市中見
村杖諸童競習詩召問之曰先生教我樂天微之詩

也水南有村市橋渡皆以平水名

翁洲在縣東舊經云徐偃王居翁洲即此王龜齡賦云

翁洲訪偃王之廬槩浦思夫差之封

十道志翁洲一名翁山在海中

徐偃王所居隸慶元

范蠡洲舊經云勾踐平吳蠡泛五湖後人思之名其洲也

山陰縣

西江在縣西四十五里源出諸暨縣界五十里西北流

入蕭山江關一里餘湖高至八尺

蘭渚在縣西南二十五里舊經云山陰縣西蘭渚有亭
王右軍所置曲水賦詩作序於此水經注云蘭亭一
曰蘭上里太守王羲之謝安兄弟數往造焉王廙之
移亭在水中晉司空何無忌臨郡起亭於山椒極高
盡眺亭宇雖壞基陛尚存世說以蘭亭叙為臨河序
賦詩者二十六人不能賦罰酒者一十六人天章寺
碑云羲之謝安謝萬孫綽徐豐之孫統王彬之王凝

之王肅之王徽之袁嶠之郗曇王豐之華茂庾友虞
說魏滂謝繹庾蘊孫嗣曹茂之曹華平桓偉王玄之
王蘊之王渙之各賦詩合二十六人謝琨卞迪丘髦
王獻之羊模孔熾劉密虞谷勞夷后綿華者謝藤任
儼呂系呂本曹禮詩不成罰三觥合十六人世說以
謝藤作謝勝餘杭令作餘姚令何延之蘭亭記云四
十一人有許詢支道林晉書列傳又有李充當以碑
為正渚旁有曲水清流激湍映帶左右訖今猶然

王晉

義之列傳云初渡浙江便有終焉志會稽佳山水名
士多居之謝安未仕時亦居焉孫綽李充許詢支遁
與義之同好嘗燕集山陰之蘭亭羊欣筆陣圖云義
之年二十三書蘭亭叙王師乾撰右軍祠堂碑云右
軍自內史後峻誓墳塋捐棄龜組曲水蘭亭自為之
序黃長睿東觀餘論云永和十年右軍年三十八時
已去會稽郡矣何延之蘭亭記云永和九年暮春官
游山陰修禊禊禮所記右軍出處年歲皆不同晉書
列傳云義之初渡浙江有終焉志會稽佳山水名士
多居之嘗與同志燕集山陰之蘭亭為之序以申其
志信如列傳則蘭亭之遊乃右軍隱居之日也按通
鑑云永和四年殷浩以江州刺史王羲之為護軍八
年王羲之遺殷浩書諫北伐十年以前會稽太守王
述為揚州刺史又晉書列傳羲之自護軍右將軍會
稽內史實代王述及述移揚州臨發一別而去後王
述檢察會稽郡疲於簡對稱疾去郡於墓前自誓時

永和十一年之三月也。以此推之，歲在癸丑為永和九年。其時為會稽內史，無可疑者。晉傳既脫畧羊欣王師、乾華所記，皆舛黃長睿號該洽、嘗跋右軍破范帖云永和十二年去會稽郡已歲餘。此語良是。至東觀餘論，則自相抵牾，有不可解。列傳又言右軍享壽五十有九，按右軍生於惠帝大安二年癸亥，沒於穆帝五年辛酉，以此推之，右軍蘭亭之遊時年五十有一。當是時，謝太傅隱居東山，遂同此集。碑署瑯琊王友、謝安是也。葛常之韻語云：「一死生為虛誕，齊彭殤為妄作。」蓋用謝安一時之語。或者又疑羲之傳為會稽內史，曰：「與尚書僕射謝安書云：『按謝安傳以升平四年為桓宣武司馬，後十餘年始當國為僕射。』而永和八年為尚書僕射者，謝尚也。以尚為安乃列傳之誤。」

上淺溪在縣西五十二里

餘支溪在縣西四十七里舊經云溪有二源一溫一涼
匯於此其溫涼不雜其實亦鏡湖之別流也故名餘
支

官瀆在縣西北一十里越絕云句踐工官也

射瀆在縣南五里舊經云越陳音教射之所越絕云射
浦句踐所教習兵處也射率陳音死葬浦西五里今
人或稱射浦

闕

縣東八十里水經麻溪溪之下為潭

關

縣西南三十里法華山唐李公垂詩云十峰排
碧落雙澗合清連自注法華寺前後有十峰迴繞雙
澗合流于良史宿天衣詩云掬水月在手弄花香滿
衣掬水疑卽謂此澗水也曾文清詩亦及此見天衣
寺

紀家匯在縣西七十里

乾道八年諸暨縣陳請開浚湖
道水利得旨浚紀家匯導蕭山

新江以達諸暨知蕭山縣謝暉言山陰松江皆山也
諸暨蕭山地勢低下小江舊以導諸暨之水也今浚
新江其底石堅不可鑿徒費民力紀家匯一開則上
流衝突而蕭山縣之桃源苧羅許賢新義來蘇崇化

昭明凡七鄉背披巨浸力疏其不便上之
議遂寢三邑民皆感其惠馮詢為作碑

嵎縣

剡溪在縣南一百五十步溪有二源一出天台一出發
之武義西南流至東陽入縣一百四十里東北流入
上虞縣界以達于江晉王子猷居山陰夜雪初霽四
望皓然獨酌酒咏左思招隱詩忽憶戴逵時在剡便
乘小舟詣之造門不前而返曰本乘興而行興盡而
返何必見安道耶今人稱為戴溪又曰雪溪皆以此

邑中亦有戴溪亭云李太白詩云試問剡溪道東南
指越鄉舟從廣陵去水入會稽長杜子美壯遊云剡
溪蘊秀異又曰歸帆拂天姥皆謂此地也

嵎浦在縣西南四十五里水經云嵎山成工嶠以北有
嵎浦浦口有廟甚靈行人及樵採者皆先致敬若相
盜竊必為蛇虎所傷浦北即嵎山與嵎山接二山雖
異縣而峰嶺相連潘逍遙晚泊詩云曉泛剡溪水晚
見剡溪山漁唱深潭上鳥啼高樹間嵎浦與石欄干

相連皆溪山奇絕之地紹興中有方士李季憇道傍
遇異人自石欄干下揖季曰君來何為季曰秦太師
遣往桐柏設醮請福其人太息曰秦今死矣張浚劉
錡皆當起為將相秦豈得存耶季大駭亟去比至天
台則秦之薨問至矣蓋天下名山宜有神仙往來云

闕

縣東北五十里

諸暨縣

闕

縣西七十里源出富陽經縣永泰鄉入于江

閩

縣北十九里吳王闔閭弟之子夫槩所封因以

為名

浣江在縣東南一里俗傳西子浣沙之所一名浣浦又名浣渚元微之詩云浣浦逢新艷蘭亭詭舊題

五泄溪在縣西五十里輿地志云山峻而有五級故以為名下泄垂三十丈廣十丈中三泄不可踰度登他山望始見之上泄垂百餘丈聲如震霆水經云浦陽浙江東逕諸暨縣與泄溪合溪廣數丈中道有兩高

山夾溪造雲壁立凡有三泄水勢高急聲震水外上
池高二百餘丈望若雲垂此是瀑布土人號為池爾
嘉祐中刁景純詩云西源窮底到東源直注層崖五
磴泉

石瀆溪在縣西南六十二里上下源各有二石井相聯
合流如瀆故以為名

上桑溪在縣東四十里

黃壇溪在縣東北五十里源出黃壇嶺

烏石溪在縣北四十八里溪多烏石故名

開化溪在縣南二里

瀨溪在縣南六十里一名堰溪

雙橋溪在縣東北十四里源出烏石溪北流入高湖

櫟溪在縣東北四十里源出白崖山北流入秘浦湖

干溪在縣東北六十二里以吳干吉故居於此故名俗

呼乾溪非也

靈泉溪在縣西二十五里源出范蠡潭山其流溉民田

甚廣他鄉多求穀種於此俗呼稻種泉

山遐浦在縣東八十里舊經云山遐斷高公湖為浦取
漁所集千艘後人思之號山遐浦按遐字彥林建元
初為餘姚長為官出豪強所藏二千戶境內肅然衆
共驅之令不得安席後至東陽太守出晉書本傳

蕭山縣

浙江在縣西二十五里源自西東來由富陽經縣一百
五十里轉北流入臨安府鹽官縣出海經云浙江西

北入海注云今錢塘有浙江也說文云別流為汜至
山陰會為浙江顧野王地志云浙江發源東陽新安
不與岷山接至錢塘江有浙山正居江中潮水衝山

即回入海故曰浙江亦曰定山是也

漢地志云浙江水出丹陽黟縣

南蠻中北逕其縣南又云穀水自太末東北至錢塘入浙江史記秦始皇三十六年臨浙江水波惡乃從狹中渡蓋捨此而渡餘杭矣莊子云浙河之水水經漸江水出三天子都即浙江也唐盧肇海潮賦云浙者折也蓋取其潮屈折而倒流也

浦陽江在縣東源出婺州浦江北流一百二十里入諸

暨縣溪又東北流由峽山直入臨浦巒以至海俗名
小江一名錢清江鄞道元水經注云浦陽江導源烏
傷縣東逕諸暨與泄溪合東回北轉逕剡縣縣開東
門向江江廣二百餘步又云柯水東北逕永興東與
浙江合謂之浦陽江引漢地里志蕭山縣潘水所出
又疑浦陽江之別名自外無水以應之謝惠連西陵
遇風詩云昨發浦陽汭今宿浙江湄韻譜云水之相
入為汭又云水北曰汭自浦陽江北流入浙江二水

參錯其名曰汭宜矣泄溪屬諸暨縣所謂東回北轉
蓋由山陰會稽滙曹娥江由上虞以入剡溪也道元
又云浦陽江東北逕始寧縣嵎山其北即嵎浦又云
東逕上虞縣南至王莽之會稽地名虞賓又云餘暨
之南餘姚西北浙江與浦陽江同歸海又引闕駟十
三州志云江水至會稽與浙江合自臨浦南通浦陽
江其說不一與二文自相牴牾蓋始寧今上虞縣嵎
浦嵎山皆屬嵎縣虞賓屬上虞又接餘姚江臨平湖

在浙江以西其源殊別餘暨即諸暨距餘姚二百餘里謂餘姚西北浙江入海非也蓋此江東北流自山陰會稽汧曹娥江始至上虞餘姚嵊縣謂東回北轉入上虞嵊縣斯可矣道元之論又曰東南地卑其流所湊故川舊瀆難以取悉此未必一皆得其實蓋道元未嘗身履浙江以東故其誤如此後人因襲遂認此江為上虞江其失則寔邈矣漢志云蕭山縣潘水所出水經云柯水東北逕永興東與浙江合今山陰

縣二十里有柯橋其下為柯水然則浦陽江與柯水

一源由蕭山以達于浙江古今蓋不易也

十道志婺州浦江一

名浦陽江蓋江之導源實出於此禹貢三江既入震澤底定韋昭云三江者松江錢塘江浦陽江蓋江之名尚矣越絕云浦陽者越王句踐兵敗衆憊於此故曰浦陽去山陰五十里唐書志越州會稽縣有府一曰浦陽今土人以錢清為古浦陽也孔延之松英集云越之通道有四西接錢塘曰浙江城西四十五里曰錢清江州之東七十里曰曹娥江餘姚縣曰姚江舊經云會稽縣東南九十里為小江津然則錢清江小江津皆浦陽江之別名也今以地里攷之自浦陽江至曹娥百餘里鄞道元誤以曹娥為浦陽江豈當時曹娥江之名未著亦名浦陽耶或陵谷遷變舊流不循其故道耶十道志云浦陽江有琵琶圻岸有曹

娥碑信此則曹娥江即浦陽爾五臣文選注云浦陽
汭經上虞至會稽山陰為浙江謝康樂山居賦注云
浦陽江自嵎山東北逕太湖其說皆誤蓋自道元
有東逕嵎縣入逕上虞之說有以誤之爾梁褚淡之
為會稽太守孫法亮叛淡之遣隊主陳願議
曹虞道納二軍過浦陽江與賊戰柯亭破之

漁浦在縣西三十里十道志云漁浦舜漁處也梁丘希
範旦發漁浦詩云漁潭霧未開赤亭風已颺謝靈運
詩云宵濟漁浦潭錢起詩云漁浦浪花搖素壁西陵
水色入秋窻

祖瀆水經云浙江又東逕祖塘謂之祖瀆昔太守王朗

拒孫策數戰不利孫靜果說策曰朗負阻守難可卒
拔祖瀆是要道也若從此出攻其無備破之必矣策
從之破朗於固陵

餘姚縣

餘姚江在縣南一十步源出上虞縣通明堰東流十餘
里經縣江東入於海江闊四十丈潮上下二百餘里
雖通海而水不鹹

菁江在縣四十五里源出四明山北流匯餘姚江以達

菁江王荊公題詩云丹樓碧閣無處所惟有江山照
眼明

湖塘浦在縣東西十里水經云餘姚水東逕穴湖塘水
沃其一縣並為良疇

上虞縣

上虞江在縣西二十八里源出剡縣東北流入江分二
道一出曹娥江一自龍山下出舜江又北流至三

江口入于海

初學記云凡江帶郡縣以為名則
有會稽江山陰江上虞江是也

運河在縣南二百二十步源出七里湖漁門浦自阜李

湖皆匯于河西抵梁湖堰東之通堰各三十五里

通明江在縣東十里源出餘姚江其西自運河入于江

有堰曰通明堰蔡舍人肇明州謝上表云三江重複百怪垂涎七堰相望萬牛回首蓋自杭經越至明凡三絕江七度堰此其一云

五夫河在縣北三十五里源出夏蓋湖曰驛亭堰凡三

十里東流入餘姚縣之菁江

夏湖溪在縣東南二十五里源出黑龍潭冬夏不竭由

下管寶泉至浦口入溪流注五十餘里

李家溪在縣南六十里源出白龍潭由上山鄉寶泉浦口入溪

杜浦在縣西南四十里梁杜京產之居也按京產傳在始寧東山開舍授學州辟從事稱疾去自浦之東山一里許其山舍下臨此浦也

顧墅灘在縣西南四十里杜京產與同郡顧歡同契在東山開舍授學世傳顧歡家墅於此一作故墅

石溪在縣南三十五里

思湖浦在縣西北六十里東通海西抵錢塘其對岸即海鹽縣俗呼為風門海口

飲牛溪在縣南五十里白道猷巖下石有繫牛足迹溪以此名邑人江公亮詩云好是道人巖畔月夜深清照飲牛溪

姚家浦在縣西北六十里一名謝浦

陳家浦在縣西北六十里

槎浦在縣西六十里

達浦在縣西北六十里

簞浦在縣東五十里

省河在縣東一十里

說者云舊有運河距梁湖通明二堰各三十餘里積雨闕壅民有墊

溺者異時邑令浚此河欲以殺運河水勢然兩河止隔一小隄每風濤上下撞擊其土易隳運河一決如建瓴水下流无被害此河之浚蓋未見其利也

釣川在縣西南七里陶隱居乘槎垂釣於此華安仁云

仙馭不返沉槎無迹謂此

新昌縣

東溪在縣東一里其源東南來自天台石橋瀑布水北
逕石笥出青檀別一源東南出南州北逕小將與青
檀別一源東南出南州北逕小將與青檀水合流入
羽林又一源南出黃杜北逕天姥山出羽林今流入
縣至虎隊支派入蛟湖入縣南流西溉田一萬二千
畝其巨派從北流過縣後西北流為三溪出嵎縣為

剡溪

唐咸通元年浙東賊裘甫陷剡縣衆數千人觀
察使鄒祗德將沈君縱張公署李珪擊之甫設

伏於三溪北壅溪上流使可涉既戰陽敗走官軍追之半涉壅水大至官軍敗三將死之後甫由黃罕嶺入剡兵

遂潰

王宅溪在縣北三十里源出四明奉化由沙溪西南入剡轉北至杜潭別一源出台州寧海由三坑西逕唐家洲紆繞三十六渡北流匯扯潭水出嵎縣浦口

查浦在縣北水經云浦東流二百餘里與句章接浦周六里其夾浦居民五百家門皆面水昔嘗過之今尚如水經所言可避世如桃源也

石筍溪在縣東八里一名石溪

柘溪在縣東南二十五里源出天姥山

石牛溪在縣西二里源出天台山瀑布

沃洲在縣東七十里晉支道林白道猷隱居於此唐朱

放詩云月在沃洲山上人歸剡縣江邊劉長卿詩云

何人住沃洲魏鄭公留題云何代沃洲今夜興倚闌

干聽赤城鐘

放馬澗在縣東三十二里支道林放馬之所

世說或譏道林養馬

不韻答曰貧道但賞其神駿自
此之沃洲天姥皆有道林遺迹

湖

會稽縣

回涌湖在縣東四里一作回踵舊經云漢馬臻所築以
防若耶溪溪水暴至以塘灣回故曰洄涌南史謝靈
運傳會稽東郭有回踵湖靈運決以為田太祖令州
郡履行此湖去郭近水物所出百姓惜之太守孟覲
執不與初學記山陰有回涌湖蓋舊屬山陰縣界

鏡湖在縣東二里故南湖也一名長湖又名大湖通典云東溪永和五年太守馬臻始築塘立湖周三百十里溉田九千餘頃人獲其利王逸少又云山陰路上行如在鏡中游鏡湖之得名以此輿地志山陰南湖縈帶郊郭白水翠巖互相映發若鏡若圖任昉述異記云軒轅氏鑄鏡湖邊因得名或又云黃帝獲寶鏡於此也酈道元注水經云浙江東北得長湖口北寫大江又大湖石帆山水深不測傳與海通然則長

湖大湖之名蓋又出鏡湖之先矣

湖魚屬山陰縣其源實出會稽之五

雲鄉也水經云湖五百里
溉田萬頃與通典不合

浮湖在縣東

石浦湖

闕

范家湖在縣東南四十里

錢湖在縣東一里湖上僧菴號興福院今為圓通寺

山陰縣

天照湖在縣東三里

茭塘湖在縣西五十五里新安鄉以塘湖多茭葑故名

諸暨縣

古放生湖在縣西南一里舊經云唐大厯中使程希賓往諸道放生遂以此湖放生禁採捕并浦陽江等凡五所俱置後改建於縣東二里為今放生池

縣湖在縣西北三里淳熙改元知縣事關橋重浚仍置二閘以漲涸為啓閉邑人便之

必浦湖在縣北七十里周四十里俗訛為祕浦其傍橫

荅曲灣以百數多採捕者

朱公湖在縣北六十里昔朱氏浚此湖

鯉湖在縣南二十里湖多鯉故名或云范蠡養魚之地
今世傳范蠡養魚經有養鯉魚法甚詳

高公湖在縣東二十里昔高氏浚此湖

蕭山縣

湘湖在縣西二里周八十里溉田數千頃湖生蓴絲最

美水利所及者九鄉以畋漁為生業不可數計

初崇化由

化夏孝昭明長興安養新義來蘇八鄉皆仰食湖利
乾道中知縣顧冲以許賢一鄉距湖水雖差邈亦可
溉及乃合舊約並以許賢為九鄉
均其利刻石示衆曰均水約東云

白馬湖在縣西一十四里周二十五里溉田百餘頃一

名石姥湖

紹興中民沈琮以湖田三千畝獻入寧壽
觀有旨兩浙漕臣驗視不可田議遂寢

爪歷湖在縣東二十五里周五里舊號臨江湖溉田二

十頃

梓湖在縣西三十五里

落星湖在縣西二十五里周二十里溉田百餘頃舊經

云後漢漢安二年落星湖中得名

湖北今五千九百二十五畝三角熙

寧中以湖地高者為田為三千八百一十一畝置十
九圍其低者不圍乾道二年撥田九百畝賜歸正官
周大仁之妻張氏議復以湖利還民淳熙十一年言
者以為請有旨下所屬開掘故湖地為田者復以予
民自邑以西逐年得水利田者得以資灌溉之利慶
元六年臨安府龍華寺僧寶華陳乞撥賜為田今湖
利遂廢

詹家湖在縣西二十五里

女陂湖在縣南二十里周四里

淨林湖在縣西二十六里周一十里俗稱杜湖

清霖湖在縣南二十二里

馬社湖在縣東二十五里邑人馬社所築

後山湖在縣東南二十七里周三里

徐安正湖在縣西四十里周一十五里以浚湖人得名

戚家湖在縣西三里與湘湖接一名椿湖

周家湖在縣南二十里

桃湖在縣南六十里

大小湖在縣關

厲市湖在縣南十二里

童湖在縣東四十里

牧馬湖在縣東四十里

千湖在縣北六十里

餘姚縣

桐下湖在縣東一十一里周十五里西北有土門

穴湖在縣東一十二里舊經引夏侯曾先地志云吳時

望氣者鑿斷此山故以名湖周六里西有土門

燭溪湖在縣東北一十八里舊經云昔人迷失道忽有

二人執燭夾溪而行因得路故名燭溪一名明塘湖

俗號淡水海周一百五十里深二丈溉田千餘頃東

西各有石閘其西閘中間易為土門奔流湍激旋即

廢慶元五年知縣事施宿始復其舊更鑿山骨闢令

廣每放湖水勢不坭人皆便之

十道志云湖中有燭
傳云昔人入山迷惑

昏暗四塞悲泣山中忽有
雙燭照之與舊經略合

梅渙湖在縣東北一十八里東即燭溪湖比其渙曲也

舊經云昔有梅樹吳時採為蘇臺梁湖側猶多梅木俗傳水底梅梁根也今巨木湛卧湖心雖旱不涸不露秋八月或有聲如鼉吼震徹數里土人謂之湖

淫

十道志吳起建鄴宮使匠人伐材往胡塘谿口梅下俄見樹長堪為梁伐材還都梁已足更別無用

梁一夜飛還上人異之號曰梅君此材今在溪中水旱則自浮沉一云用為禹廟梁是也舊經云梁時修廟惟欠一梁忽風雨漂一木至乃梅梁也今梅梁以二鐵絙繫之楹間相傳此物歲久特為神異云

鱧子湖在縣東北三十五里周八里有土門

桐木湖在縣東北四十里周八里傍多桐木故名湖內

有田七百四十五畝

上林湖在縣東北六十里周五十八頃有奇有石閘
上澳湖在縣東北七十里周三頃有奇有石閘埭各一
所

寺湖在縣東北五十里周八十餘畝北有土門

烏戎湖在縣北十里周三十餘畝有土門

黃山湖在縣北二十五里周二十八里溉田一百頃有

土門

獨姥湖在縣北四十里周八里西有土門上有獨姥祠
附子湖在縣北三十里周二十五里

勞家湖在縣北三十五里周一百五十餘丈

松陽湖在縣東南一十五里周九十畝東有土門

檀湖在縣東南一十八里周五十畝東北有土門

東泉湖在縣南一十五里周十畝

西泉湖在縣西南一十五里周七里

莫家湖在縣西南一十五里周三百畝東有土門

前溪湖在縣西南一十七里周百畝北有土門

鴨蕩湖在縣西南二十里周百畝北有土門

蒲陽湖在縣西南二十五里周十二里北有土門

趙蘭湖在縣西南二十七里周百五十畝北有土門

樂安湖在縣西二十里周二十九頃有土門

臧墅湖在縣西三十里周四里

小檀湖在縣西三十七里周一十七里南有土門

牟山湖在縣西北三十五里周三十里東北有土門

汝仇湖在縣西北四十里周三十里有土門六所湖內

籍田七百餘畝

湖南先有田數多紹興二年得旨復廢為湖詳見上虞縣志蓋湖注

餘支湖在縣西北五十里周二十里有土門七所湖內

籍田三百餘畝

千金湖在縣西北六十里周十五里西有土門

漁浦湖在縣西北六十里一名白馬湖舊經引夏侯曾

先志云驛亭埭南有漁浦湖深處可二丈漢周舉乘

白馬遊而不出時人以為地仙白馬湖之名由此水

經云漁浦湖中有大獨小獨二山唐貞元中置湖門
三所別於北門置放水塘四百步

上虞縣

西溪湖在縣西南三里舊七里湖舊經云縣令戴延興
立周七里故以為名溉田二百頃

阜李湖在縣西北五里周一十五里

謝陂湖在縣北三十五里舊經云謝靈運莊也自湖至
謝氏西莊一十餘里

大楂湖在縣東北一十里周九里三十步湖中小阜號

龜山

破岡湖在縣北二十五里舊經云吳時望氣者鑿斷山

岡因名

任嶼湖在縣西北二十七里舊經云寶曆二年縣令金

堯恭開置溉田二百頃

夏蓋湖在縣西南四十里湖內三十六溝其岸北二斗

門依山有神祠湖東北則夏蓋山也

夏蓋一作夏駕
又作夏架水經

云西陵湖西有湖城山東有夏架山湖水上承妖皋
溪而下注浙江古語云夏駕山浮蓋山屹立于湖中
不為湖水之漲涸也紹興二年上虞縣令趙不搖言
縣所管夏蓋湖等一十三處為田不便吏部侍郎李
光奏一方利害無甚於湖田乞比較興湖為田以來
所失常賦孰多孰少自政和以來以湖為田者乞復
為湖得旨張守真經久利害以聞限三日知越州張
守言上虞縣夏蓋湖改為田者一百三十二頃二十
四畝餘姚縣汝仇湖等湖一十三所改為田八十一
頃四十九畝二年內暗失米四千二百三十六石八
斗有零民間所失當復數倍乞復廢為湖自此兩縣
可望全熟委是經久有利無害奉聖旨依仍自三年
正月
為始

給事傅公崧鄉守鄉郡時侍郎陳橐入幙上公利便

橐竊惟執事作鎮鄉郡必思所以興利除害為此邦
悠久之福橐亦嘗蚤夜籌慮期有獻於左右其間非
無利害之大者復念吾君遷播未有定居戎馬憑陵
疆圉弗固乃欲於此時陳利害之說是猶疾病之人
邪氣未除而遽議調補亦似乎不知務也故事非迫
切於今日者皆未敢輒有言前日因至上虞境內過
夏蓋湖而備究湖田之為害實吾民今日倒懸之苦
有不得不言者古人設陂湖以備旱歲王仲毅建請

以為田乃引鑑湖自然淤澱已成田陸為說又有不
妨民間水利之語其欺罔甚矣然佃戶占請之初各
有畝數不敢侵冒當時湖之為田者纔十二三佃戶
止於高仰處作埭未敢涸湖以自便民田尚被其利
但溜水不如曩日之多故諸鄉之田歲歲有旱處比
年以來冒佔不已今則湖盡為田矣以夏蓋湖推之
諸處可以類見橐所知者止上虞餘姚其他四邑皆
不及知

新昌嵊
縣無

上虞餘姚所管陂湖三十餘所而夏

蓋湖最大周迴一百五里自來蔭注上虞縣新興等
五鄉及餘姚縣蘭風鄉此六鄉皆瀕海土平而水易
洩田以畝計無慮數十萬唯藉一湖灌溉之利今既
涸之為田若雨不時降則拱手以視禾稼之焦枯耳
其他諸湖所灌注皆不下數百頃植利人戶倚以為
命而乃盡奪之一遇旱暵非唯赤子飢餓僵踣道路
而計司常賦虧失尤多雖盡得湖田租課十不補其
三四又況每遇旱歲湖田亦隨例申訴官中檢放與

民田等昨見上虞丞言曾蒙上司差委相度湖田利害因點對靖康元年建炎元年湖田租課除檢放外兩年共納五千四百餘石而民田緣失陂湖之利無處不旱兩年計檢放秋米二萬二千五百餘石只上虞一縣如此以此論之其得其失豈不較然民間所損又可見矣但當時以湖田租課歸御前與省計自分兩家雖得湖田百斛而常賦虧萬斛嬖倖之臣猶將曰此百斛者御前所得也不初湖田何以有此省

計虧羨我何知哉今湖田租課既充經費則漕臺郡
守固當計其得失之多寡而辨其利害夫公上之與
民一體也有損於公有益於民猶當為之況公私俱
受其害可不思所以革之耶橐得之父老云本州之
湖其自然可以為田者唯有鑑湖高仰去處蓋不失
水利兼與民田亦無相妨其他皆隨湖廣狹以定植
利之頃畝尋常湖水平堤旱歲尚憂不足頃見李宣
州言此利害甚詳而明必曾與執事熟論况執事越

人也想前已洞達於胷中君子懷濟民利物之志每
恨不得行耳然則解斯人之倒懸顧不在今日乎橐
愚意欲望執事斷以不疑除鑑湖外諸縣湖田悉罷
之以便民誠不貲之利也然儻俟奏報則湖田皆在
四月上旬插種之後若行罷廢似非人情不廢則失
今夏溜水之利故橐必冀左右以權宜即日施行一
面具利害聞奏仍上章待罪如四聰嘉納則粒米狼
戾之慶可坐而致或俞音尚闕則湖已溜水今歲不

得為田足以寬嗷嗷之衆秋間果得一稔則疲氓可
蘇盜賊可息人樂其生無思亂之意執事雖以此得
罪亦無愧於心矣此事唯在斷而行之雖謀之上客
謀之益友愚恐少有肯贊高明以必行者執事試召
所親信三數人詢之必有二三之論非其智識有不
逮也其勢然耳為國計者必曰湖田歲入幾萬斛正
今日經費所賴而遽罷之則緩急何以濟為左右計
者必曰行在咫尺公為守臣豈可不待奏報而專罷

行之事此皆知其一而不知其二也又或以為未必
然者亦人情之常橐若非前日親見雖他人以誠相
告亦未盡信蓋橐聞湖田之害熟矣向雖在幙府未
嘗言及今播種迫期方獻言於左右誠以親究其害
耳執事僅以橐之言為信不異身臨而目覩也恐或
以為湖田行之累年矣縱不便於民未應疾苦若此
其甚豈可未聞於朝一旦驟欲罷廢待報而行未為
晚也橐謂此特拘攣守常者之言非惻怛愛民者之

言也吾民困苦極矣前此怨嗟叫號為其父母者恬不聞知流害滋深以至今日今執事將自比於拘攣守常之徒乎抑以世之重自任耶又事有大可慮者頃年雖有豐有凶然富民薄有儲畜兼他邦轉糴可以相補故小民幸免於溝壑今北騎所過之地穀粟皆被焚蕪屈指聚落之間有餘糧者無幾且無他邦轉糴之望而官兵支費又將取給於民父子兄弟不相聊矣然猶竭力耕種以覬秋穫雨澤在天不可必

也陂湖之與奪在人幸未至於後時可不任其責哉
失此機會歲事或虧湖田之租常賦之額兩無所得
元元艱食流離道路強者為盜弱者為丐嘯聚弄兵
豈不由此執事當自見之知橐不為過論也建炎二
年春邑民嘗訴湖田之害於撫諭使者使者下其狀
於州縣上虞令陳休錫遂悉罷境內之湖田翟帥以
未得朝廷指揮數窘之陳不為變是歲越境大旱如
諸暨新嵎赤地數百里農夫無事於鉅艾獨上虞大

熟餘姚火之

餘姚七鄉通江湖陰注兼有燭溪湖等數處不可作田不曾廢故亦熟

而

上虞新興等五鄉被夏蓋湖之利尤為倍收其冬新
嵎之民糴於上虞餘姚者屬路不絕向使陳令行之

不果則邑民救死不暇况他境乎夫以一縣令尚能

為之橐之所望於左右宜如何

聞陳令見在會稽敢望呼召訪以利害

橐既知利害之詳今或不言橐則有罪遂敢不避僭
易仰瀆聽覽不任悚懼更有數項鄙見條具于後

此事如蒙采擇須在三月盡文字到諸縣設或遲

緩不可過四月初二三也蓋此時湖田插種者尚
少兼植利人戶須於梅雨前脩築堤塘雨作之後
難以施工也橐三月十一日舟行湖中詢田夫云
已種二十之一至月末可種十之一若罷湖田所
插之秧當為棄物興大利不可恤小害也左右果
欲施行不可先使衆人知恐刻未得以為市

租湖田人有願種者亦有不願者往往相半蓋王
仲巖多仰勒等第人租田或插種不及即空納租

課如此之類皆不願者緣湖田不罷不敢推還官
中年年以為患亦有請數畝為名而侵佔蔓延至
百十畝如此之類皆願種者此湖之所以盡為田
也前此累有論訴官中差人打量只是為刻木及
牙人乞覓租課只仍元額未嘗增也擅湖利者皆
鄉村豪強之人中間上司體量利害此輩行賄至
千餘緡今來或罷田當有訴牒紛然並至必以已
種為詞亦有乞俟收成罷廢者此乃緩官中行遣

至期官吏移易又復寢矣惟在台嚴少加懲戒毋
為浮言所惑幸甚

似聞鑑湖所入居一郡湖田課額之半可望台旨
令案吏具數亦可簽帖稟聞朝廷若有鑑湖田止
減其半而民田免旱涸常賦無虧減亦朝廷所樂
聞也

上虞陂湖之為田者共一十四所共管納租米四
千餘石其西溪湖等十三所共納二千餘石而夏

蓋湖獨管納二千餘石可以見夏蓋湖之廣濶係
上虞餘姚兩縣六鄉二萬餘戶植利所繫非輕蓋
六鄉皆邊海彌望盡是平陸非如衢婺諸郡間有
池塘可以蔭注自興湖田無歲不旱大旱之歲至
檢放秋米一萬餘石逮建炎二年陳令罷湖田獨
此一鄉無一戶訴旱其利害甚明

前年陳令為新昌丞案備聞其

語恐台意以謂方朝廷多故又總鄉邦帥權慮事

涉太專未欲盡罷不識可先罷夏蓋湖田否蓋具

他諸湖比之為狹縱失其利未為大害雖州郡行遣不當分彼此然一時權宜救民之所甚急於理無礙此亦侯雍齒之意民間曉然皆知惠之將及

我也

此已涉第二義恐思其上者而不得故謾及之

此項如蒙垂聽須當出榜述夏蓋湖利害及先罷之因并言已一面具奏付下植利張挂仍令本縣告示佃戶即時罷種若止行下本縣而不出榜恐刻木特遲其事必致後時榜文既到必

不敢匿

橐今所言儻不蒙鄙斥更當密詢利害條具呈以
備回鑒時論列橐恐安撫龍圖為事已迫期不暇
草奏敢乞只以橐今所言錄白繳進其間不急之
語乞賜刪去苟利於民橐雖死不恨

梨湖在縣西北二十里唐縣令金堯恭開置

皮湖在縣西北三十里

廟門湖在縣北一十二里周三里

潛湖在縣西南四十二里並湖民多潛姓故以名

高公湖在縣西南一十二里周二百餘畝

隱嶺湖在縣西北二十五里周二百畝

小楂湖在縣東北一十五里周七里

湖與餘姚縣雲樓鄉接蓋此湖雖屬

縣而灌溉之利乃及於雲樓鄉以水勢東傾而就下也湖今溉田一十六頃四十畝

光嚴湖在縣西南四十二里

孔家湖在縣西南四十二里

章汀湖在縣西南四十二里周三百六十畝

高境湖在縣西南四十里周四十餘畝

錢家湖在縣西南三十里

圖湖在縣西南四十二里

上湖在縣西南四十里

圓湖在縣西南四十里周八十畝

姚山湖在縣西南四十五里周四里

江湖在縣西南五十里

昔有尼寺一夕陷於湖有寺鐘墮水底有見之頃歲旱涸車注

垂竭忽見鍾鼻鄉人共挽出之俄傾雷雨暴至鍾復沒

菱湖在縣西南四十五里

馬家湖在縣西南五十里

鍾湖在縣西南五十里周二百二十畝一名鍾家湖

大湖在縣西南五十里湖雖濶其水利止及近田

伶仃湖在縣西南五十里

赤峴湖在縣西南五十里

池湖在縣西南五十里周七十餘畝

主山湖在縣南四十里

銅山湖在縣南二十五里唐和元二年邑民葉再榮率
其里人開創始再榮語於人曰銅山之北谷嶺之陽
有泉滔滔不竭可瀦之以備歲旱余鼎黃定童雲悉
力助成之鄉貢進士張岳記

瀦湖在縣南五十里

周家湖在縣南四十里

尚湖在縣西南三十里

旱湖在縣西南四十里

韓湖在縣西南四十里

白馬湖在縣西南四十里在夏蓋湖南水經云白馬潭深無底創湖之始邊塘屢崩百姓以白馬祭之因以

名其湖焉

白馬湖有三一在蕭山或名石姚湖一在餘姚或名漁浦湖惟此湖無別名

黃灣湖在縣西南四十里

雙湖在縣西南四十里

四角湖在縣西南五十里

雙碁湖在縣西南五十里

沐憩湖在縣西南五十里

前厲湖在縣南四十里

蚌湖在縣南四十里

葛糧湖在縣南三十里

李家湖在縣南四十里

隄塘

會稽縣

稱浦塘在縣東四十里唐地里志云會稽東北四十里

有防海塘自上虞江抵山陰百餘里以蓄水溉田開
元十年令李俊之增脩大厯十年觀察使皇甫溫太
和六年令李左次又增脩之隆興中吳給事芾重加
浚疊李益謙譔記云府城北水行四十里有塘曰防
海自李俊之皇甫溫李左次躬自脩之莫原所始皇
朝改隸巫山威鳳二鄉適直其地為田八百頃前志
謂畜水以利灌溉今泯然無跡而海水冒田獨為民
病塘之外不能尋尺其役始以紹興三十二年十月

成以隆興二年十月云

鍊塘在縣東五十七里舊經云越王鑄劍於此越絕云
句踐炭瀆鍊塘各因事而名水經銅牛山北湖下有
鍊塘里句踐鍊冶之處

稱心海塘在縣東北五十里

菁江石塘在縣東六十里俗稱石塘越絕云石塘越所
害軍船也塘廣六十五步長一百五十三步淳熙九
年令楊憲重築加甃塘岸一里餘

北塘在縣東北八十里北抵平江府大澤

刑塘在縣北一十五里舊經引賀循記云防風氏身三丈刑者不及乃築高塘臨之故曰刑塘張伯玉會稽山詩云防風獨彊梁後至行趑趄天威不可捨敗骨盈高車至今憔悴煙慘淡藏封隅華安仁刑塘詩云汪芒後至知何用敗骨空專一素車

夾塘俗傳漢太守馬臻所築夾鏡湖而為塘也

康家塘自塘以外即鏡湖一名東隄

倉塘在縣東五十里舊經云昔倉楚共築此塘堰水溉田營居室於此故名

杜塘在縣東十五里少微山下嘉祐中兩浙漕杜公所築齊祖之詩云新築隄成號杜塘結茅深穩佔湖光

山陰縣

古塘在縣西南二十五里晉太守謝輜築

運道塘在縣西北一十里唐地里志云元和十年觀察

使孟簡築

富中大塘越絕云句踐治以為義田肥饒故謂之富中也十道志句踐以田肥美故富中都文選吳都賦富中之毗貨殖之選舊經云富中里

界塘在縣西四十七里唐垂拱二年始築為隄五十里闊九尺與蕭山縣分界故曰界塘

闕

石塘在縣西北四十里越絕云越所害軍船也塘廣六十五步長一百五十二步

下塘在縣西南一百二十里

支塘在縣西南一百里

嵯縣

漢塘在縣北二十五里

新塘在縣西三十里

廣利塘在縣西三十里

蕭山縣

捍海塘在縣東四十里長五百餘丈闊九尺

荻涇塘在縣南二十里

柳塘在縣西三十里茗山下

餘姚縣

東部塘在縣北四十里慶厯中謝景初董役海塘詩云
五行交相陵海水不潤下處處壞隄防白浪高於馬
董衆完築塞跋履率曠野自塘以西為長隄詳見海

隄

謝家塘在縣北四十里

王家塘在縣北四十一里

和尚塘在縣北四十二里

上虞縣

上塘在縣南水經云江南有上塘陽中二里隔在湖南
常有水患太守孔靈符過蜂山前湖以為埭下開瀆
直指南津又作水埭二所以會北江得無淹漬之患

橫塘在縣南三十里

新昌縣

泄塘在縣西南七里長廣三十畝

新塘在縣東三里

夾溪塘在縣南里僧顯忠詩云南溪北溪深橫塘截流
過

池

會稽縣

放生池在府東南一十里天寶二年祕書監賀知章表
乞永周湖數頃為放生池詔許之明年春以黃冠歸
故鄉賜鑑湖剡中一曲敕永周湖為放生池府有池
放生始見於此先是梁元帝時荊州請立放生湖其
碑文見藝文類聚唐初州縣未有其制自唐天寶後
李愷於襄州置放生江顏真卿於昇州來石及湖州
各置放生池至乾元元年沿江諸州自池至洋八十
一州各置池一所其敕書有云所以宣皇恩廣慈愛

也國朝天禧元年詔江浙淮南荆湖路諸州舊有放生池廢者悉興之原無池處沿江淮州軍近城上下五里並禁採捕天聖二年詔諸郡縣未置者於附郭三里浚之紹興十三年勅有司以時省視網罟入者以盜論自永周歲久湮沒更為民田舊池寢廢歲遇壽節放生無定所隆興二年廢田二百七十頃以為放生池奏聞詔從之又於池側置咸若亭曾文清公撰記

謝公池在縣南五里

王右軍洗硯池在縣南五里白馬山下舊經云王右軍洗硯處今人指叢山潢汙為池非也

鵝池在縣南二里叢山戒珠寺前舊經云王右軍養鵝之所華安仁攷古云逸少既善筆札性復好鵝所在穿池滌墨其傍必有牧鵝之所此池是也

方干池在縣東十里澄波坊唐方處士所居華安仁攷古云雄飛門巷雖改故池未湮即此池也干字雄飛

以詩名號雲菴處士門人私謚文英

日月池在縣東北一里池二所俗傳錢武肅王所浚王有目疾故浚此二池云

山陰縣

王公池在西園皇祐五年知越州王達始置齋祖之撰記云方錢氏仗鉞為後庭棹謳鳬鴈之樂邦人不與其觀聖朝受圖籍建守宰且百年前治越者始新西園及公始命邦人無小大得恣樂其中故王公池非

新也由王公名之也

南池在縣東南二十六里會稽山池有上下二所舊經云范蠡養魚於此又云句踐栖會稽謂范蠡曰狐在高山上不享魚肉之味久矣蠡曰臣聞水居不乏乾煖之物陸居不絕深澗之寶會稽山有魚池於是脩之三年致魚三萬今上破塘村乃上池

蘭亭古池在縣西南二十五里王右軍修禊處唐大厯中鮑防嚴維呂渭列次三十七人聯句於此云曲水

追歡處遺芳尚宛然名從右軍出山在古人前賞是
文辭會歡同癸丑年

王右軍墨池在縣西南二十五里蘭亭橋東華鎮記云
聞右軍上巳日修禊處在天章寺有墨鵝池皆遺迹
池不甚深廣引溪為源每朝廷恩命至池墨必先見
皇祐中忽三日連發未幾御書至趙清獻公親到池
上與僧約曰池墨見即當為請之既燭香致禱須臾
響應墨光黑色倍常時因貯之於甕以獻于朝任宅

田布罷任游山以香酒祭池倏忽墨見留詩云田曹

郎更何多幸親見池中墨水生

復齋漫錄載臨川王右軍墨池每貢士之

歲或見墨汁點滴如潑出水面則必有登第者此池靈異亦其比也

右軍鵝池在縣西南二十五里華鎮記云聞鵝池有白魚長數尺有捕者騰躍而起鬣如銀下前池而去後復見於池中蓋異物也

瑟瑟池在縣西二里以池水湛碧故名錢公輔小隱山記云山堂因山之名凡一景一趣無不為之稱有瑟瑟

瑟池

龍噴池在縣西一里酒務前

西禪池在縣北五里

龜山魚池在縣西一百步龜山下唐元微之留題云勸
爾諸僧好護持不須垂釣引青絲雲山莫厭看經坐
便是浮生得道時李公垂詩云汲水添池活白蓮十
千彷彿盡生天凡庸不識慈悲意自葬江魚入九泉
後有題云微之詩戒僧以護生之意及公垂見而笑

之未幾果有寺僧罽於池中者故公垂因形之於詩云

嵎縣

放生池在縣東三里

右軍墨池在縣南十五里金庭洞晉王右軍所居也唐裴通記云金庭洞天在縣之東南循山趾而右得小香爐峰即洞天之北門常聞異香時值仙人從古不死真天下之絕境也瑯邪王羲之家于此山其書樓

墨池舊制猶在通以元和二年二月來遊登書樓臨墨池但見其山水之異

諸暨縣

放生池在縣東二里周四十里一名放生湖唐天寶中縣令郭密之築隄塘溉田二十餘頃池心有小山狀如龜號龜山其東有虹梁扁放生橋

餘姚縣

放生池在縣南以東西各一百五十步立石為界隆興

改元知縣事王度始置朱待制翌撰記

鴈池在縣東雙鴈里水經曰南太守虞國舊宅號西虞
即雙鴈送歸處華鎮詩云南國使君歸故里霜鴻飛
舞送朱輪

項家池在縣南一十里

洪家池在縣南一十五里

阮家池在縣西南三十五里

上虞縣

放生池在縣南二百步

朱公洗硯池在縣西北四十里池側有學堂云朱買臣讀書堂其西有朱侍中廟

謝公洗屐池在縣西北三十里東山傍俗傳康樂遺迹以其登山躡屐也然華安仁攷古詩云謝公白首乘軒地長記滄波洗屐時又指言謝文靖爾

潭

會稽縣

孤潭在縣東南舊經云若耶溪側潭深而清孤石聳出
潭上有大櫟木謝靈運與惠連聯句刻於樹側水經
云麻溪下孤潭周數畝甚清深有孤石臨潭垂崖俯
視猿狖驚心寒木被潭森沉駭觀麻潭下注若耶溪
水至清照衆山倒影窺之若畫唐人徵故事聯句云
古寺思王令孤潭憶謝公

賀精潭在縣東南

少微潭在縣少微山下

龍潭在縣東南

嫡耳潭在縣東一作的耳

鹿迹潭在縣東南

山陰縣

射的潭在縣南仙人石室下潭深叵測

破潭在縣東廣八十畝

照潭在縣南

包家潭在縣西北

蘇家潭在縣南

月潭在三山之西廣袤數畝於觀月為宜然不知其得名之始

壽家潭又在潭之西差小於月潭

嵯縣

下鹿苑潭在縣西鹿苑寺西源出山巔二小穴石湧流至葛仙翁祠下出二石甕間又一里許石崖壁立瀑布十餘丈下瀦為潭頃歲旱投簡潭內劃有聲俄頃

水盡黑電自潭發雨驟至如響

三懸潭在貴門山下有龍祠號普濟崇禱有應

簞山潭在縣東水經云東有簞山山下衆流前導湍石
汎激浮溢四注

五龍潭在烏猪山巔潭有五龍故名

響巖潭在細嶺

靈巖潭在子周山

石門潭在縣西

動石潭在縣東北

餘姚縣

竹山潭在縣東

泉潭在縣東南

鬼嘯潭在上林山坳人迹罕到傍有龍王祠崇禱有應

上虞縣

彈潭在昇相山之巔垂瀑百餘丈匯於潭潭上巨石隱隱有足迹號仙人迹

黑龍潭在縣南俗呼其山曰潭山山之上下凡三潭山巔人迹罕至最下潭居山椒傳云嘗有黑龍見

白馬潭在縣東水經云白馬潭深無底創湖之始邊塘婁崩百姓以白馬祭之用以名

白龍潭在縣南山頂有三潭凡請禱者挽樓而上僅至下潭已目眩股栗不可留傳云昔有白龍見故名

新昌縣

長潭在縣西南其源西南自東陽北出夾溪過穿巖別

一源南自天台出墓門溪東轉寒峯徑西與穿巖水
合流入于潭又西北流入剡西門唐方干詩波濤漫
撼長潭月謂此

百丈潭在縣東潭三所皆神龍所窟

海隄

餘姚海隄綿亘八鄉其袤百四十里慶厯中縣令謝景
初治隄事始築二萬八千尺王文公安石記之厥後
增築視舊倍蓰隄或罅敝不堅受潮之蓄頽圯摧隳

甚則蕩折田疇漂溺室廬於是歲起役夫六千人人
為役二十日率於農隙董治脩築更或苟且不經意
隨築輒壞隄蓋未嘗固也慶元二年令施宿始因歲
役革具就實既竣事則圖所以永其存蓋東之為雲
柯梅川上林在承平時嘗有牛秘丞斲石為隄歲久
隄移石亦湮沒命工求諸淤淖而具得之爰相舊規
創意疊索既壯其東偏矣西之為蘭風東山特當濤
勢衝突徒恃土隄懼不能久則又計工採石鼎新改

築蓋為費者八千緡而西偏石隄復立焉深惟厥終
俾民蠲役經營海塗開墾曠土總之得田千六百畝
有奇迺建置海隄莊用其租入隨時補苴力不困下
而隄益固自是歲省民夫十有二萬提舉常平劉誠
之以事請于上報可而顯謨閣學士樓鑰為海隄後
記

會稽志卷十